

皇朝藩部要略

皇朝藩部要略卷十二

前史官壽陽

祁韻士

纂

寶山

毛嶽生

編次

江陰

宋景昌

校寫

平定

張穆

覆審

厄魯特要略四

皇上乾隆元年撤兩路大軍還北路於烏里雅蘇台及鄂爾坤西路於巴里坤及哈密各留兵戍守

二年四月噶爾丹策凌貽超勇親王策凌書欲仍遊牧阿爾台稱策凌爲車臣汗策凌獻其書

詔以己意答之策凌答書曰阿爾台乃天定邊界爾父
瑛台吉時阿爾台迤西原無厄魯游牧自滅噶爾丹以
來我等建城駐其地衆所共知其不令爾游牧者原欲
以此爲閒地兩不相及以息爭端耳今台吉云難以讓
給試思阿爾台果係誰地誰能讓給爾誠遵

旨定議我必不爲禍始亦不復向科布多居住又謂我
等置哨逼阿爾台宜向內撤夫哨兵乃

聖祖仁皇帝時所設至今並未外移卽議定地界豈能
不設爾台吉其自思之十一月準噶爾使至

召策凌馳來京主其議

三年二月以準噶爾未遵

旨指明地界

飭使還十二月噶爾丹策凌遣使哈柳奉

表至請循布延圖河南以博爾濟昂吉勒圖烏克克嶺
噶克察等處北以遜多爾庫奎多爾多輝庫奎至哈爾
奇喇博木喀喇巴爾楚克等處爲界厄魯特邊人仍在
阿魯台山後游牧并乞令托爾和布延圖哨兵向內移
詔弗允是年

上以喀爾喀族聚青海不忍令析處

詔簡台吉領之以達什敦多布任公中札薩克一等台

吉。

四年二月哈柳還十月復至請如原議毋踰阿爾台蓋自與準噶爾議界至是議始定阿拉善多羅貝勒阿寶卒次子羅卜藏多爾濟襲

五年土爾扈特部多羅貝勒丹忠卒子羅卜藏達爾札襲以幼

遣理藩院官代理牧務

十年噶爾丹策凌死次子策妄多爾濟納木札勒嗣

十一年辦理青海事務副都統象佛保遵

旨宣諭諸札薩克歲防汎議以郡王額爾德尼額爾克

托克托斃之長子索諾木丹津及札薩克台吉袞布喇
布坦色特爾布木多爾濟色布騰薩拉等防得卜特爾
汎以郡王袞楚克達什車稜喇布坦貝子丹巴輔國公
納木札勒車凌札薩克台吉達瑪璘色布騰等防伊克
柴達木汎十人爲五班三年一察軍械額爾德尼額爾
克托克托斃奏請以所屬十佐領給索諾木丹津十之
六給車稜多爾濟十之四以索諾木達什隸索諾木丹
津以多爾濟隸車稜多爾濟別設一札薩克
允之

詔授車凌多爾濟爲札薩克一等台吉多爾濟以輔國

公隸之未幾多爾濟卒子納罕札木素降授一等台吉
輔國公爵停襲準噶爾台吉策妄多爾濟納木札勒遣
宰桑馮木特奏請赴藏煎茶

十二年以準噶爾使赴藏煎茶道噶斯復議自伊克柴
達木得卜特爾外設汎哈濟爾察罕烏蘇

十三年厄魯特札薩克多羅額駙色布騰旺布卒色布
騰旺布前以無嗣育從子朋素克爲子至是襲爵

詔降襲固山貝子朋素克祖曰罕都卽阿喇布坦兄父
曰索諾木

十五年青海部札薩克輔國公納木札勒車凌自青海

赴唐古特次喀喇烏蘇聞珠爾默特納木札勒叛馳至
布達拉城護視達賴喇嘛尋大軍定唐古特亂

諭嘉之晉封固山貝子阿拉善札薩克郡王羅卜藏多
爾濟尙郡主授多羅額駙

十七年撤還土爾扈特代理官

十八年

詔授土爾扈特羅卜藏達爾札札薩克領其衆未幾以
羅卜藏達爾札不更事仍遣官代理冬杜爾伯特部台
吉三車稜來歸三車稜者曰車凌曰車凌烏巴什皆鄂
木布岱青和碩齊裔曰車凌蒙克爲達賴泰什弟保伊

勒登齋統稱杜爾伯特台吉巴約特其屬部也杜爾伯特以車凌爲長車凌烏巴什次之巴約特以車凌蒙克爲長聚牧額爾齊斯達瓦齊亂起因謀內附達瓦齊系出準噶爾巴圖爾琿台吉有布木者號額爾德尼台吉子策凌敦多卜以族台吉同名別稱大策凌敦多卜子五長納木札爾達什次多爾濟丹巴次巴哩次達什車稜次班珠爾達瓦齊卽納木札爾達什子康熙初布木嘗附噶爾丹表貢駝馬布木死大策凌敦多卜父子助策妄阿喇布坦父子屢擾隣牧及策妄多爾濟納木札勒嗣童昏無行不聽其姊鄂蘭巴雅爾之言反謂其欲

效俄羅斯自立爲扣冒汗而拘繫之鄂蘭巴雅爾之夫
薩奇伯勒克因助其庶兄喇嘛達爾札攻而弑之喇嘛
達爾札遂篡汗位小策零敦多卜之子達什達瓦與輝
特台吉阿睦爾撒納和碩特台吉班珠爾謀立噶爾丹
策凌幼子策旺達什爲汗喇嘛達爾札覺之遂殺策旺
達什及達什達瓦時達瓦齊游牧額密爾領準噶爾二
十一昂吉之一阿睦爾撒納等告以禍將相及遂走和
通呼爾哈將攜衆五千來降定邊左副將軍喀爾喀親
王成袞札布以聞

諭曰達瓦齊乃大策凌敦多卜孫前與準噶爾定界時

未嘗與約不受降。且自噶爾丹亂後。收養準噶爾人甚衆。若達瓦齊至而不納。是絕其歸路矣。達瓦齊果力窮來歸。可量給糧騎。馳送京師。旣而達瓦齊走哈薩克。喇嘛達爾札索之。遂竄歸。與阿睦爾撒納謀弑喇嘛達爾札。襲其位。小策凌敦多卜孫訥默庫濟爾噶爾與構兵。各令杜爾伯特族助。車凌等欲拒之。不敵。欲事之。莫知所從。集族言曰。依準噶爾。非計也。不如歸。

天朝爲永聚計。有喀爾喀卒額璘沁達什者。爲準噶爾所掠。聞其謀。脫歸以告。

詔定邊左副將軍喀爾喀親王成袞札布。俟車凌等至。

察其誠可納之。旣而三車凌棄額爾齊斯牧，率部衆來歸。車凌從者三千百七十餘戶，口以萬計。車凌烏巴什從者千二百餘戶。車凌蒙克從者七百餘戶。車凌蒙克於諸台吉行獨尊，且兼領巴約特務，以故從車凌蒙克至者凡七百餘戶。戚屬僅百有四，餘皆巴約特屬隸之者。由準噶爾東，烏蘭嶺，烏英齊而行，越旬有九日，至博東齊。遣使巴顏克什克都圖爾噶等馳赴巴顏珠爾克，以降故告，而留其衆於額克阿喇勒，以待成袞札布遣守汛者視慮其詐。檄喀爾喀兵備之，以聞。

諭曰：車凌等降，非叵測也。達瓦齊與訥默庫濟爾噶爾

構兵車凌等助之。勝負難豫定。幸而從者勝。卒爲人役。不若歸降之爲得計也。旣遣使以情告。若仍令處汎外。恐追兵至。或有失。可卽徙入內汎。暫給牧畜。徐議安置事宜。先以車凌車凌烏巴什及從至者。酌遣數人。令其瞻仰朕躬。朕自優加恩賚。侍郎玉保往諭。並頒賜御用冠服。甫就道。

上念所部習邊外。以未出痘者爲生身。若卽令至內地。雖傷一僕。從不忍。

詔俟明歲受朝塞外。勿遽來京師。負矜恤意。而三車凌懼準噶爾兵襲。請急徙入汎。且獻馬爲贄。成袞札布納。

之令暫駐烏里雅蘇台達瓦齊遣宰桑馮木特以兵襲不及乃逸玉保至三車凌懷迎十里外宣諭之跪奏鳴爾丹策凌時思內附以衆志未變且法嚴故不獲間今避亂來歸思觀

天顏蒙

恩軫念避痘令緩入覲期先請以宰桑等朝京師車凌使曰和通巴顏克什克車凌烏巴什使曰哈錫哈車凌蒙克使曰巴圖

十九年正月三車凌使至

詔與朝正諸藩臣宴

上以所部間道至。駝馬疲甚。且乏畜產。不忍遽遠徙。詔視推河。札克拜達里克庫爾奇勒可耕地。置之穀種。取諸歸化城。復

賜車凌車凌烏巴什羊各五千。車凌蒙克羊三千。贍之。尋定收札克拜達里克。車凌烏巴什屬巴啟齊倫等叛。逸喀爾喀。又盜車凌屬伊爾都齊馬。索不給。且射殺之。詔喀爾喀札薩克。以鄂爾坤防秋兵百視牧。復檄諸札薩克隣汎者。弋叛賊務獲。後巴啟等就擒。治罪。有色布騰者。從三車凌來。善約眾。三車凌以告我視牧大臣。詔色布騰參贊軍務。選所部兵二百。偕內大臣薩拉爾

議招烏梁海及札哈沁復以所部患痘

諭色布騰馳赴張家口外

命大學士傅恒迎勞之

詔封多羅貝勒歸牧協理所部盟長務三車凌之來達
瓦齊遣禡木特追之由博爾濟河入喀爾喀汎復逸出
上以守汎如門戶何得任準噶爾出入

諭責駐防烏里雅蘇台副都統達青阿罪至是達青阿
奏誘擒禡木特及從者三十五人

諭曰禡木特倘召之不至或至而心懷不服則擒之可
今遣使往輒至不明懲其罪反誘擒不可

詔宥罪遣歸給冠服。馮木特械至鄂倫瑚都克汎侍郎
王保宣

諭釋之。謝罪歸。夏四月。

諭曰。內札薩克及喀爾喀。咸設正副盟長。董理牧務。今
新降台吉車凌等。攜至戶口。悉編旗分佐領。其設正副
盟長。如內札薩克及喀爾喀例。

賜賽因濟雅哈圖名。五月。

駕幸熱河。駐蹕避暑山莊。三車凌率諸台吉至。

賜宴萬樹園。觀火戲。

諭曰。杜爾伯特台吉車凌等。皆準噶爾渠酋。向慕仁化。

率萬餘衆。傾心來歸。宜敷渥澤。錫子封爵。以示懷柔。至意。其各鈐所屬。令安分謀業。勿負朕恩。時所部設札薩克十有三。自三車凌外。曰色布騰。曰蒙克特穆爾。曰根敦。曰班珠爾。曰剛。曰巴圖蒙克。曰瑪什巴圖。曰達什敦多克。曰恭錫喇。曰巴爾。封親王。郡王。貝勒。貝子。公。一等台吉。有差。諸札薩克既歸牧。

詔車凌選所部兵五百。赴薩拉爾軍。剿烏梁海。車凌蒙克子巴朗。久蓄叛志。至是乘間挈衆逃。車凌蒙克子四長齊默克。早死。次巴朗。次巴雅勒當。次博斯和勒。巴朗從父內附。中道謀竄歸。準噶爾以告巴雅勒當。及宰桑

濟爾哈朗達瓦達爾札納木凱贊卜尼瑪齊厓等未敢發車凌蒙克入

覲將以子巴朗及巴雅勒當行巴朗詭稱疾不之從巴雅勒當復固辭弗許攜就道巴朗煽齊默克子巴布勒及屬眾二百餘遁族台吉蒙克特穆爾從之蒙克特穆爾兄弟三蒙克特穆爾爲長次額布根次齊巴克額布根從三車凌入覲蒙克特穆爾留視牧

上以蒙克特穆爾爲其昆弟長

詔封札薩克固山貝子額布根將歸牧蒙克特穆爾從巴朗叛遁

詔撤額布根還勿赴牧以車根代轄其眾蓋防爲竄黨所煽也額布根聞蒙克特穆爾叛自慚忿請從大軍征達瓦齊且擒叛黨以贖乞車根代入告

上獎其知大義

授札薩克一等台吉有翁郭爾者蒙克特穆爾屬也聞其主有叛志力沮之蒙克特穆爾刃傷之脅偕行卒不從裏創往追竄黨縛密什爾以歸

授三等待衛職

詔將軍策楞及色布騰等緝巴朗及蒙克特穆爾務獲其從逃眾悉宥車凌蒙克歸牧巴朗遣從者伯克增起

誘巴雅勒當往會。遇汎兵，就擒，訊其狀。

詔誅伯克增起，嚴防間諜。及游牧眾竄，巴朗偕蒙克特穆爾由北路問道行，經烏克嶺，哈布塔克拜達克奇蘭阿拉克台布哈和洛諸境，聞追軍至，輒逸，遂竄匿準噶爾界。其從逃之沙拜塔爾納瑪琳曼集巴顏恩克等，後先脫歸。

詔宥罪，給車，凌蒙克轄之。秋七月，將軍策楞請徙三車凌牧於歸化城。青山東時議備兵，征達瓦齊。

諭曰：巴朗等甫叛竄，若徙之，將滋新降疑懼。且非辦理準噶爾本意。其令安處舊牧，勿他徙。達瓦齊遣使奉表。

詔遂歸。阿睦爾撒納本和碩特拉藏汗長子。噶爾丹丹忠之次子。噶爾丹丹忠之死。阿睦爾撒納方孕未產。其母博托洛克改適輝特台吉偉徵和碩齊。而後生。故冒稱輝特族。初與達瓦齊竄哈薩克。未幾潛歸舊牧。襲殺其異母兄輝特台吉沙克都爾。而據其眾。尋殺喇嘛達爾札。而立達瓦齊。頗爲達瓦齊所信任。其後達什達瓦之姪納默庫濟爾噶爾欲與達瓦齊分領準噶爾眾。阿睦爾撒納以計誘殺之。恃功益驕橫。達瓦齊察阿睦爾撒納異志。兵擊之。阿睦爾撒納蹙乃爲內面計。至是偕和碩特台吉班珠爾等間道來降。

上以達瓦齊虐苦所部降者至輒告準噶爾如水火狀衛拉特諸台吉挈數萬眾屯內訛急於安撫將俟伊犁定議設四衛拉特如舊。

諭曰準噶爾本元之臣僕竄處西北恃其荒遠憑陵番部我

皇祖聖祖仁皇帝三次親征肅清沙漠

皇考世宗憲皇帝時策妄阿喇布坦父子濟惡仍肆跳梁是以命將出師聲罪征討朕嗣統當

皇考降旨撤兵之後而噶爾丹策凌遵守定界遣使請安求通貿易朕特加恩俯允以示懷柔迨噶爾丹策凌

物故。其子策妄多爾濟納木札勒爲孽。兄喇嘛達爾札所殺。而喇嘛達爾札復爲達瓦齊所弑。在喇嘛達爾札雖承緒不正。尙屬噶爾丹策凌之子。至達瓦齊則篡竊亂臣耳。乃今年夏間遣使來京。仍請赴藏熬茶。覲然以噶爾丹策凌自處。試思堂堂大清中外一統。而夷部亂臣妄思視同與國。此其逆天悖理爲何如耶。上年杜爾伯特台吉車凌等率衆來降。今秋輝特台吉阿睦爾撒納等又舉部內附。斯均窮蹙來歸之人。朕爲天下共主。兼覆並載。旣無拒而不納之理。而喀爾喀內地俾此輩數萬衆仰食聚處。將來滋生蕃庶。亦豈久安善策。朕於

達瓦齊初無興師問罪之意而事會所至揆之理勢實有不得不從長經理者特將此番用兵始末宣示中外知之杜爾伯特部諸台吉咸從大軍征達瓦齊或隸薩拉爾隊稱西路哨探軍或隸阿睦爾撒納隊稱北路哨探軍三車凌之至也告族台吉訥默庫留準噶爾戶千餘剛多爾濟額爾德尼巴圖博羅特如之將乘間內徙至是果偕輝特台吉阿睦爾撒納和碩特台吉班珠爾至。

詔賜牧畜置塔楚鄰三車凌牧冬十月

駕由盛京旋

蹕避暑山莊

詔色布騰偕新降台吉訥默庫阿睦爾撒納等入覲。賜宴錫之爵。杜爾伯特部曰訥默庫封郡王。曰剛多爾濟曰巴圖博羅特封貝勒。曰布圖克森曰額爾德尼曰羅壘永端封貝子。曰布顏特古斯曰蒙克博羅特封輔國公。曰烏巴什曰伯勒克封一等台吉。凡設札薩克十編旗分佐領如三車凌例。分左右翼設正副盟長各一。輝特部曰阿睦爾撒納封親王。和碩特部曰班珠爾封郡王。曰納噶察封輔國公。班珠爾卽阿睦爾撒納同母兄。納噶察者噶爾丹丹忠弟索爾札之子也。索爾札爲

準噶爾所掠禁齋恨死納噶察與班珠爾聚處至是避
達瓦齊來降禡木特之歸也以厄魯特及烏梁海兵八
千爲達瓦齊掠阿睦爾撒納衆阿睦爾撒納既內附請
從大軍擊札哈沁索所略

上以烏梁海及札哈沁近內汛

詔內大臣薩拉爾逐禡木特等阿爾台外會雪盛不可
行而禡木特感不殺恩且念達瓦齊不足事陰有歸志
有準噶爾宰桑號通禡木特者游牧諾海克卜特爾近
索勒畢嶺爲布拉罕察罕托輝下游禡木特赴其牧將
掠通禡木特爲請降計通禡木特覺誘執之薩拉爾謀

得狀由烏蘭山陰以兵驟至通禡木特就擒索得禡木特責負恩罪禡木特以情告請徙牧內屬遣札哈沁得木齊等招所部六百餘戶降薩拉爾檻禡木特至軍詔釋之入覲京師

上鑒其誠授內大臣職

賜冠服大軍擊札哈沁準噶爾克爾努特台吉阿卜達什率眾降

詔授札薩克一等台吉附阿睦爾撒納牧

二十年

詔禡木特與朝正會宴以通禡木特卒

諭馮木特善視其戚屬烏梁海降臣察達克招服包沁察獲杜爾伯特屬以獻

詔給所部二月命班第爲定北將軍出北路阿睦爾撒納副之科爾沁親王色布騰巴爾珠爾郡王成袞札布內大臣馮木特參贊軍務永常爲定西將軍出西路薩拉爾副之郡王班珠爾貝勒札拉豐阿內大臣鄂容安參贊軍務兩副將軍各領前鋒三千先進將軍參贊繼之北路出烏里雅蘇台西路出巴里坤各攜兩月糧期會於博羅塔拉河

諭曰達瓦齊雖有罪究屬一部台吉倘伊屬人見事勢

窮蹙將伊擒獻。毋加戕害。候朕諭旨遵行。禡木特密奏曰。阿睦爾撒納豺狼也。雖降不可命往。往必爲殃。

上以不逆詐諭之。阿睦爾撒納亦告我參贊大臣固倫額駙色布騰巴爾珠爾曰。禡木特非傾心降者。不可信。今哨探兵以札哈沁從。恐漏師。不如令在後隊。色布騰巴爾珠爾以聞。

諭曰。禡木特老成習事。故令前往。若停其行。是滋疑也。阿睦爾撒納以禡木特掠其屬。與之隙。故不願偕行。朕用人期益事。豈以他人言爲從違乎。

詔定北將軍班第。飭勿相忌。班第請徙札哈沁衆於札

布堪庫克嶺諸地防乘間竄。

詔置之齋拉罕。勿內徙滋疑。授禡木特總管。以厄魯特喀喇巴圖爾阿玉錫爲翼領。包沁宰桑阿克珠勒尋率眾降。察獲禡木特族屬。

詔給之初。準噶爾定札哈沁包沁納賦例。比年獻脯。間年供牲。贍喇嘛遇軍則令助。

詔如舊例。免今歲賦獻。授阿克珠勒爲包沁總管。以禡木特兼領之。三車凌旣入覲歸。

詔選兵二千。以車凌領其一。隸北路。車凌蒙克色布騰從之。以車凌烏巴什領其一。隸西路。各授參贊大臣。訥

默庫等繼至請從軍。

詔隸西路以車凌烏巴什訥默庫皆幼不更事。

詔調車凌蒙克赴西路軍從車凌烏巴什訥默庫等行。而是時阿睦爾撒納爲北路副將軍納默庫其妻弟也。固請隸北路軍。

允之以故偕三車凌至者隸西路副將軍薩拉爾隊偕訥默庫至者隸北路副將軍阿睦爾撒納隊。

賜車凌整裝銀二千車凌烏巴什訥默庫各減十之二。給從軍者羊及餼糧有差并

賞車凌烏巴什三眼孔雀翎。

諭常服之。

賚阿卜達什白金五百爲裝資。從大軍。次察罕呼濟爾。阿卜達什以兵三百馳赴額密爾。爲哨探前隊。有察袞德濟特者。伊克明安族也。率屬降。

詔以阿卜達什等轄其屬。

諭西路副將軍薩拉爾曰。巴朗負恩叛逃。卽窮蹙乞降。非投誠可比。或聞其父車凌蒙克進兵西路。潛由北路奔走。額琳哈畢爾噶迎降。乞宥。爾聞之。卽遣兵往擒巴朗。令車凌蒙克自不得以招撫爲辭。

詔車凌及車凌蒙克遣宰桑以善耕卒百赴額爾齊斯。

蓋杜爾伯特眾兼耕牧業。視喀爾喀專以收爲產者異將

遣綠旗及喀爾喀兵屯耕額爾齊斯。以所部識水泉道。且善耕。

命簡卒往導。俟大功成。遣收眾歸額爾齊斯。先是和碩特輔國公納噶察願返青海。

諭俟達瓦齊亂定。歸青海。與留準噶爾。唯所便。納噶察抵牧。易辭告班珠爾。稱奉

詔。令和碩特族歸青海。至是將以兵從征。

諭班第詰其情。納噶察復易辭。稱奉

詔令由巴里坤徙牧。班第責不符旨。納噶察慚謝。上以其謫而喜事。

詔班第密察之復

諭曰。納噶察徙牧青海。志果誠。情尙可憫。俟事定後。具奏請旨。非必不可行事也。薩拉爾道遇達瓦齊使入貢。請罪叱之曰。我奉

天子命往討達瓦齊。他非所知。羈達瓦齊使。以表達京師。軍行抵察罕烏蘇。遣侍衛塔齊圖等。齎檄往招達瓦齊。達瓦齊竄赴格登。大軍抵伊犁。羅卜藏丹津就擒。諭曰。羅卜藏丹津負恩背叛。逃往準噶爾。偷生三十餘

載今兩路大軍至。伊無路奔竄。仍就擒獲。實足以彰國憲而快人心。羅卜藏丹津俘至。告祭

太廟

社稷。行獻俘禮。

上御午門樓受之。以

世宗憲皇帝有羅卜藏丹津至。仍有罪之旨。

詔免死。子巴朗及察罕額布根授藍翎侍衛。餘戚屬處伊犁者。詔勿內徙。

詔賜車凌阿睦爾撒納雙親王俸。車凌蒙克晉封多羅郡王。車凌烏巴什晉封和碩親王。封馮木特三等公爵。

賜信勇號。

賞雙眼孔雀翎四團龍服。

命常服之。並增護衛員。達瓦齊不卽降。由格登率千餘騎竄踰庫魯克嶺。諸軍分道躡。皆以馬疲返。車凌烏巴什偕輔國公瑪什巴圖。率輕騎八百尾之。定北將軍班第。令車凌蒙克督所部兵。駐防伊犁。令色布騰轄烏魯木齊。至博羅塔拉郵務。北路軍奏以訥默庫參贊列名。詔西路軍奏亦並列。三車凌及色布騰名次參贊大臣。鄂容安後。蒙克特穆爾之叛。與巴朗分道竄。聞追軍至。輒逸。有哈薩克錫喇。及都噶爾者。皆噶勒雜特宰桑也。

巴朗與蒙克特穆爾以窮無所歸。往依都噶爾。未幾。哈薩克錫喇。自噶勒雜特走額琳哈畢爾噶。乞降西路軍。巴朗蒙克特穆爾游行塔本集賽。副都統達什敦多布。馳緝之。巴朗棄孛遁。蒙克特穆爾族台吉巴顏恩克。始從叛。尋與之失。脫歸。不知蒙克特穆爾蹤。以從都噶爾。赴額琳哈畢爾噶告。

詔西路軍偵擒之。會北路軍次塔本集賽。牧都噶爾乞降。以蒙克特穆爾獻。訊罪。詭稱巴朗遁逃。行次奇蘭。輒悔罪。謀擒巴朗。以告札哈沁宰桑。馮木特。不之助。故中止。乞宥罪。免死。不旬日。額伯津宰桑等。檻巴朗至北路。

軍。

諭車凌蒙克曰。爾父子前來歸誠。冀受朕恩。甫入覲。爾子巴朗乘間遁。不獨負朕恩。且悖爾志。情罪甚重。國法難貸。念爾誠心感戴。效力從軍。爾孫巴布勒。或爲巴朗所逼。或與巴朗同謀。皆可置之不問。以加恩爾故。特宥之。俟至烏里雅蘇台。仍遣赴爾游牧。爾其知之。巴朗及蒙克特穆爾。尋械至。

上告祭

太廟社稷

御午門樓。行受俘禮。誅之大軍。駐伊犁。準噶爾台吉噶

爾藏多爾濟及輝特台吉達瑪璘並乞降達瑪璘者杜爾伯特親王車凌女夫也時厄魯特巴濟及茂海車稜等皆前死巴濟弟噶爾丹達爾札偕達什達爾札濟克濟札布及茂海車稜子迎降

論曰叛賊子弟理應治罪但伊等父兄俱已死亡姑從寬免伊等由喀爾喀叛逃今應仍令游牧喀爾喀所但所屬戶口甚多著於伊等台吉內令大者准攜三十戶次二十次十戶餘俟事竣酌量安置諸台吉仍導令入覲又有伊克明安台吉巴桑獻籍三百餘戶降班第以聞

詔賜冠服珮飾。有善披嶺集賽之得木齊蘇克都爾格齊霍什哈及古里特鄂拓克之得木齊和通喀喇博羅莽斂伊什克特咱瑪博勒等。告舊爲和碩特台吉羅卜藏車凌屬。獻籍六百戶。羅卜藏車凌子曰諾爾布敦多克。游收額琳哈畢爾噶。遣長子鄂齊爾馳降。定北將軍班第遣招其族。台吉三濟特聞之。獻籍三百戶。初都爾格齊諾顏有子曰丹津琿台吉。于康熙時曾遣使入貢。其子曰阿喇布坦。有子二。長噶勒丹敦多布。生沙克都爾曼濟。次敦多布車凌。生明噶特。達瓦齊善沙克都爾曼濟。倚任之。小策凌敦多卜孫訥默庫濟爾噶爾。與達

瓦齊構兵。沙克都爾曼濟擊之。殲其孥。達瓦齊既竄。格登沙克都爾曼濟乃詣大軍降。郡王班珠爾私奪諾爾布敦多克沙克都爾曼濟諸台吉屬產。班第禁之。乃稍戢大軍。踰伊犁。追達瓦齊。遣視其營。負格登崖。臨淖薩。拉爾等議曰。大軍經萬餘里。未嘗血刃。遺鏃。今達瓦齊懼誅。爲負嶠計。撻伐之。將玉石俱焚。毋乃非。

聖天子救絕域意。不如誘擒之善。以喀喇巴圖魯阿玉什巴圖濟爾噶勒察哈什三人領健卒二十二。人宵策馬入達瓦齊營。招降台吉宰桑等四十九人。及厄魯特兵五千餘。達瓦齊逸。參贊大臣達爾黨阿等躡擊之。收

達瓦齊叔父班珠爾及從者六千餘。達瓦齊踰庫魯克嶺竄班第。遣使分道索烏什阿奇木伯克霍集斯。偵達瓦齊赴喀什噶爾。伏兵林間。遣弟攜酒及馬給迎之。達瓦齊至。伏驟起。達瓦齊及子羅卜札宰桑愛爾齊丹津達爾巴蓋烏巴什敦多克摩羅木色克色德色吹索諾木額木齊圖巴等七十餘人悉就縛。霍集斯馳告班第。遣兵五百迎諸穆素爾。械赴京師。準噶爾平。是役也。上獨申睿斷於天時人事。智深勇決。洞悉機先。師行萬里。兵不血刃。大功迅奏。廟算無遺。詳具

欽定平定準噶爾方略中。阿穆爾撒納之乞進兵也。本欲假手大兵。滅準噶爾。以己爲瑄台吉。總轄四衛拉特。上以內附衛拉特諸台吉。錯處內牧。非得地。眾建之。不可。俟準噶爾定。將復設四衛拉特。以車凌爲杜爾伯特汗。班珠爾爲和碩特汗。阿睦爾撒納爲輝特汗。其綽囉斯汗。則俟噶爾丹策凌子。姓來降者授之。阿睦爾撒納赴軍時。與諸台吉備聞。

命而志未贖。及平達瓦齊。乃自昵于額駙科爾沁親王。色布騰巴爾珠爾。使與將軍班第爲難。而以己情託其歸奏。時班第鄂容安留伊犁。籌善後。阿睦爾撒納輒隱。

以總汗自處擅調兵擅誅殺不服

賜服不用副將軍印自用理台吉菊形篆印其移檄哈薩克也言自統蒙古漢兵屯伊犁諱言奉

天子命又使其黨賂伊犁喇嘛等曰若阿睦爾撒納統準噶爾必善育爾等又與和碩特輔國公納噶察及新降諸宰桑阿巴噶斯納蘇圖烏克等密語竟夜將軍參贊先後密以聞先是

上令阿睦爾撒納九月至熱河行飲至禮同四部台吉受封而阿睦爾撒納前與額駙約期七月下旬俟命額駙歸不敢奏而入覲期迫班第促之行以喀爾喀親王

額璘沁多爾濟監之。就道詭遣納噶察歸告班第曰。阿巴噶斯借伊犁喇嘛等言。若不令阿睦爾撒納統準噶爾眾甯剖腹死。班第斥之。阿睦爾撒納知計不得。遂八月十九日。行至烏隆古河。距其牧札布堪河近。乃詭言暫歸治裝。以副將軍印交額璘沁多爾濟。使先行。有降夷首其謀。額璘沁多爾濟不之信。竟縱之去。遂由額爾齊斯河間道北逸。遣使迎其孥於札布堪河。時

上已密諭烏里雅蘇台軍營擒其孥。并其同母兄班珠爾收之。越半日而賊使至。得不遣。賊四出煽亂。伊犁諸喇嘛宰桑劫掠軍台。蜂起應之。時大兵已撤。伊犁僅駐

兵五百。班第鄂容安被圍。徇節焉。西路將軍永常自木
壘退屯巴里坤。并移軍糧于哈密。北路聲援斷。賊勢益
盛。初伊犁定班第以車凌車凌烏巴什訥默庫及新降
之綽羅斯台吉噶爾藏多爾濟和碩特台吉沙克都爾
曼濟輝特台吉巴雅爾等列入覲。初班三濟特鄂齊爾
次之。

駕幸木蘭。車凌等至。召覲。

行幄。慰諭之。旋。

躡避暑山莊。御淡泊敬誠殿受朝。

詔以車凌爲杜爾伯特汗。賜特古斯庫魯克達賴號。噶

爾藏多爾濟爲綽囉斯汗。以沙克都爾曼濟爲和碩特汗。以巴雅爾爲輝特汗。

諭曰。準噶爾互相殘殺。羣遭塗炭。不獲安生。朕統一寰區。不忍坐視。特發兩路大兵進討。諸台吉宰桑等畏威懷德。悉屬來歸。從軍自效。今已平定伊犁。擒獲達瓦齊。是用廣沛仁恩。酬庸效績。準噶爾舊有四衛拉特汗。今卽仍其部落。樹之君長。其董率所屬。務勤養教。受朕無疆之福。封伊克明安台吉。巴桑輔國公。賚白金千五百兩。

賚阿卜達什白金五百。

詔歸塔密爾牧

諭茂海子齊默特多爾濟摯戚屬附厄魯特郡王朋素克牧餘仍留伊犁授和碩特三等台吉特默齊札薩克一等台吉資白金十賜孔雀翎時班珠爾以附阿睦爾撒納叛論罪

諭曰班珠爾同族台吉特默齊及敦多克達什唐拉札卜等俱不必辦理仍令照舊居住游牧和碩特三濟特鄂齊爾繼至

詔授三濟特札薩克一等台吉鄂齊爾閑散一等台吉遣歸牧初阿睦爾撒納逆形已著

上欲乘其未發誅之。密敕班第圖之。會阿睦爾撒納已就道。且有哈薩克貢使隨行。班第恐哈薩克驚疑。遂不敢發。至是。

上乃以先後敕除阿逆密旨。及班第等狐疑章奏。宣示中外。黜額駙親王爵。赴軍效力。

賜額琳沁多爾濟自盡。逮永常治罪。以策楞代之。玉保富德達爾黨阿爲參贊。兩路邁進討賊。色布騰請率兵往剿阿睦爾撒納。

上以甫從軍還。不欲數勞之。慰諭歸牧。未幾。以色布騰與阿睦爾撒納夙怨。且悉厄魯特情。

詔赴烏里雅蘇台。偕駐防大臣等籌軍務。仍授參贊大臣。以所部兵從。悉給俸餉口糧。色布騰聞命。卽馳就道。諭曰。色布騰自歸誠以來。奮勉效力。征準噶爾。頗著勤勞。且聞朕旨。卽以兵馳赴烏里雅蘇台軍。急公任事。誠可嘉予。著賞郡王品級。若能更立殊勲。朕當加以重賞。今由西路進兵。擒厄魯特叛賊。北路尙無所事。惟新收汗哈屯烏梁海。及續降輝特眾。應加防範。著色布騰留心體察。旣抵軍營。妻孥悉令從往。所有陳奏軍務。著列名於喀爾喀親王成袞札布桑齋多爾濟之次。都統雅爾哈善之前。色布騰尋以疾道卒。

賜賻祭子巴桑襲定西將軍策楞將以大兵剿阿逆
詔沙克都爾曼濟往會甫就道謀者以阿逆據伊犁告
諭遣親信宰桑馳諭所部備兵勿爲鼓煽而以身從大
軍擊賊班珠爾械至禁獄所請遣三濟特鄂齊爾書令
和碩特衆分剿阿逆三濟特旣得書言諾爾布敦多克
沙克都爾曼濟皆隣牧且族台吉瑪尼巴圖巴蘇泰瑪
賚烏巴什弩庫特圖魯孟克阿穆爾弩斯海薩望等皆
無異志當以書遺之鄂齊爾亦稱願歸告父共剿逆我
副將軍薩拉爾集伊犁宰桑等定議約諾爾布敦多克
及沙克都爾曼濟子圖捫以兵至博囉塔拉布爾哈蘇

皇朝通志卷一百一十一
三
台蘭勒奇嶺剿阿逆諾爾布敦多克圖們各遣使至巴里坤諾爾布敦多克表曰臣父羅卜藏車凌前鳴爾丹策凌時謀內附不獲間大軍征達瓦齊臣族班珠爾倚阿睦爾撒納奪臣屬臣願奮志剿賊

上嘉其誠

詔封公爵以班珠爾所奪給之十月俘達瓦齊至告祭太廟

社稷行獻俘禮

上御午門樓受之

詔宥罪賜冠服白金時阿睦爾撒納已叛綽羅斯降台

吉噶爾藏多爾濟封綽囉斯汗遵

旨赴定西將軍策楞營達瓦齊奏臣俘囚蒙

聖主不加誅而賜厚恩捐糜頂踵不足爲報阿睦爾撒
納臣夙讐也背恩叛竄恨不奮擒杜爾伯特台吉伯什
阿噶什庫本諾音台吉諾爾布等臣知不與賊黨請遣
書令協力剿擒庶彰國法以快人心

諭曰前因準噶爾夷部數年以來篡奪頻仍所屬諸部
率衆內嚮接踵而至朕爲天下其主旣不忍拒而不納
將爲之經理游牧卽因其地處之爲長久計而兩朝未
竟之緒亦乘此事機一勞永逸此用兵之本意也至達

瓦齊之立爲台吉。不過外夷自相篡竊。原可不必聲罪致討。從前所降諭旨甚明。但以達瓦齊進貢請安。尙居然以噶爾丹策凌自處。是以降敕切責。旋復遣使叩關。情詞恭順。則大軍已入其境。未得至京。將軍等取其書奏之。及王師進取伊犁。伊畏避逃竄。亦屬恒情。是達瓦齊原無獲罪天朝。其殘酷暴虐。亦皆出阿睦爾撒納之口。迨俘獲來京視之。則一庸憊可憫之人耳。且言久思歸順。特以阿睦爾撒納領兵前行。實不便於其軍前納款。此其肝膈本懷。非由飾說。古者異國降王。或優以封爵。示無外也。達瓦齊著加恩封爲親王。賜第京師。奉朝

請朕撫馭萬國一秉大公仁育義正惟聽人之自取可
將此宣示達瓦齊并曉諭中外知之復

諭曰朕已將達瓦齊宥罪施恩封爲親王帶領伊子居
住京師伊舊日屬人著查出四五十戶令來京役使并
著策楞曉諭噶爾藏多爾濟等及準噶爾人眾從前進
兵擒剿達瓦齊止因阿睦爾撒納愬其暴戾無狀凌虐
準夷朕軫念羣生拯救水火是以聲罪致討今拏解來
京乃一庸愚無用之人卽伊種種虐行其初亦皆係阿
睦爾撒納從中相助非伊一人之罪且達瓦齊原係綽
囉斯台吉朕憐憫其愚修藩京邸斷不令至游牧見在

達氏齊感戴朕恩，思圖報效，繕寫書信寄伊親信之杜爾伯特台吉伯什阿噶什庫本諾音台吉諾爾布等，令其協擒阿逆，以彰國法。具見誠悃，著策楞卽行轉交。仍將伊等接到達氏齊書言語情形，速行奏聞。後伯什阿噶什諾爾布皆降，噶爾藏多爾濟叛從子札納噶爾布戕之，復爲扈魯瑪台吉達氏所殺。十二月車凌等以乏牧產，請徙額克阿喇勒。

諭曰：前議平定伊犁後，遣歸舊牧額爾齊斯。若額克阿喇勒距額爾齊斯較札克拜達里克路更邇，且附近內汛調所部兵亦易俟擒獲阿逆後，仍當遣歸舊牧所部。

生計既艱。其給籽種六百石。務令及時耕種。毋悞農期。至從軍所給駝馬。自應交納。但念往返道遠。牲畜不無疲瘠。可姑緩期二載。訥默庫之將從征達瓦齊也。請徙牧拜達里克北札布堪河源博囉喀卜齊爾至鄂爾海喀喇烏蘇界。

允之。

諭努力成功。勿念游牧眾。至是以車凌等將徙牧。詔往會。而訥默庫隱有叛志。謀竄就阿睦爾撒納。剛多爾濟巴圖博羅特布顏特古斯等阻之。不聽。從眾乘間劫驛騎。戕守汛弁兵。奪運糧商民駝物及貨。

皇朝藩部要略卷之十三

前史官壽陽 祁韻士 纂

寶山 毛嶽生 編次

江陰 宋景昌 校寫

平定 張穆 覆審

厄魯特要略五

二十一年正月大兵長驅至特克勒河探知阿逆僅距
一日程將急追之忽有報台吉諾爾布已擒阿逆來獻
者玉保遂駐軍待之先以紅旗報捷於策楞策楞亦卽
轉遞至京而賊已遁入哈薩克二月兵至伊犁將軍參

贊互相咎託言馬力竭頓兵不進大軍之自伊犁旋也杜爾伯特設正副盟長各三從車凌至者分左右翼曰車凌曰車凌烏巴什爲盟長曰色布騰曰車凌蒙克副之從訥默庫至者別自爲部以訥默庫爲盟長剛多爾濟副之至是訥默庫叛

諭曰訥默庫盟長員缺剛多爾濟自授副盟長以來鈴束所眾尙爲甯謐著卽授爲盟長復

諭曰剛多爾濟等屬妄行劫掠應交部議札薩克罪但念伊等新降未諳內地禁例姑從寬免阿逆之將叛也詭稱葉爾羌喀什噶爾諸回眾將襲伊犁請勿遣剛多

爾濟歸令護視特穆爾圖諾爾降眾蓋欲陰扇之爲已助也班第察其奸不之從遣剛多爾濟歸其屬有鄂勒錐者偕訥默庫諾斯海自哈薩克使還道遇阿逆強令從行阿逆叛以鄂勒錐等非其黨麾從者擊之鄂勒錐偕諾斯海奮搏逾時乃脫遇游騎載賊裝至迎擊之事聞。

詔優賚之伯什阿噶什者杜爾伯特台吉伊斯札布之曾孫也祖札勒父車凌多爾濟兄曰布達札卜曰達瓦克什克弟曰達瓦齊特曰格咱巴克聚牧伊犁河西沙拉伯勒境鄰哈薩克牧達瓦齊虐其眾伯什阿噶什將

三皇清道... 卷一 二
二
棄之懼襲而寢大軍抵伊犁班第遣使招之因獻籍三千餘戶降將遣從車凌等入覲告哈薩克數掠所部請歸視比抵牧偵哈薩克集兵遣告且請大軍援
論嘉其恭順會阿逆黨擾伊犁

詔遣和碩特輔國公納噶察齋

敕往諭曰準噶爾內亂頻仍各部人眾咸失生業朕爲統一天下之君懷保羣生無分中外特發大軍往定伊犁方欲施恩立制永安反側乃逆賊潛懷叛志妄思并吞諸部肆其荼虐罪狀已著畏誅潛遁朕已命將窮追務期弋獲逆賊一日不獲諸部一日不安爾台吉輸誠

歸命果能仰體朕旨去逆效順或以兵協勦阿逆或俟
至爾牧擒獻之朕必大沛殊恩爾其奮勉自效達瓦齊
復奏伯什阿噶什及庫本諾音台吉諾爾布必無異志
命遺之書未達而伯什阿噶什已徙牧訥默庫將叛竄
剛多爾濟尾之尋駐防烏里雅蘇台辦事大臣阿蘭泰
偕車凌車凌烏巴什等以兵擒訥默庫及其孥械至論
如律籍其屬分給車凌車凌烏巴什

詔不附逆諸札薩克各安游牧勿疑懼先是札哈沁公
禡木特奉

詔偕班第議準噶爾善後事班第以禡木特總管札哈

沁包沁牧請仍置阿爾台增喀爾喀藩籬。

允之尋撤大軍還札哈沁兵三百遣歸牧。馮木特以疾留伊犁。阿逆叛將脫歸乏兵衛爲逆黨哈丹等所遮。脅之降不從。擒赴阿睦爾撒納所。阿睦爾撒納慰之曰。準噶爾與

天朝疆域殊。爾欲內向。何也。不如歸我。當善視爾。馮木特唾而言曰。天下豈有無君之國哉。達瓦齊篡而虐。聖天子討其罪。噶爾丹策凌嗣已絕。我不內歸。將焉往。且

天朝已擒我。不卽誅。復釋還。此所謂生死而肉骨也。何

忽肯之爾先我往。

聖天子待爾厚。爾乃謀逆。今既擒我。我何懼。死則死耳。大軍至。將磔汝。犬猶不食汝肉。阿睦爾撒納慙。縊殺之。至是策楞謀得狀。以告。

御製詩憫之。褒爲烈士。且有千載流聲芳之句。

諭曰。禡木特年就邁。效力行間。甚爲奮勉。今逆賊戕之。深可憫惻。其孫札木禪。著令仍襲三等信勇公爵。三月。以阿睦爾撒納煽烏梁海梗哈薩克道。

詔札木禪從哈達哈。剿烏梁海叛賊。和碩特台吉諾爾布敦多克來歸。薩拉爾等既定謀。阿逆偵知之。先備諾

爾布敦多克以兵擊諸伊犁之諾爾斯哈濟拜姓不勝。偕薩拉爾間道行。由珠勒都斯至巴里坤。時沙克都爾曼濟抵策楞軍。

詔令遺書其子圖們以兵護牧。書未達。明噶特附阿逆叛。脅所部眾圖們不之從。挈戚屬抵珠勒都斯請內徙。上憫之。

詔封多羅貝勒。賜銀千兩。

賞雙眼孔雀翎。

諭由額琳哈里爾噶往會沙克都爾曼濟。有圖什墨勒厄爾錐音者。從大軍剿阿逆。中道強取諾爾布敦多克。

屬。

詔責之。察所取以歸。阿逆爲大軍所敗。竄赴伯什阿噶什牧。

詔參贊大臣侍郎玉保等傳諭擒獻。或故縱。以兵剿之。伯什阿噶什養子博東齊尋偕宰桑諾斯海摯衆至。以哈薩克侵牧告。宰桑賽音伯勒克得木齊恩克濟爾哈爾等踵至告。哈薩克道掠間走乃免。

詔博東齊以兵迎其父。暫置從衆於額爾齊斯。諾斯海護視之。賽音伯勒克或從博東齊往。或留牧額爾齊斯。惟其便。博東齊將行。伯什阿噶什攜戶八百餘抵額爾

齊斯請內附烏巴什其族台吉也從至

詔封伯什阿噶什爲札薩克和碩親王烏巴什爲札薩克固山貝子

諭曰爾誠心感戴率眾投誠前大軍抵伊犁卽謁將軍大臣甫欲加恩封賞旋遇阿逆背叛未獲舉行爾爲哈薩克所掠輾轉遷徙始克內附爾眾甫至不必簡兵往從大軍亦無須徙內地卽游牧額爾齊斯河爾族台吉車凌等將歸舊牧爾等聚族而處實爲允協不必遠離故土徒勞往返也命甫下伯什阿噶什等攜眾抵哈達青吉勒

詔暫留。俟明歲歸額爾齊斯牧。初土爾扈特族巴圖爾烏巴什爲噶爾丹策凌婿。初附牧伊犁境。大軍至。乃乞降。會阿逆事起。詭言以兵赴博羅塔拉。助大軍剿逆。不果往。至是偵阿逆爲大軍所迫。覬據伊犁。轄四衛拉特。聞我師有備。竄察罕烏蘇。博羅布爾噶蘇阿勒坦特卜什勒卜什沙爾海諸境。謀追兵至。輒逸。仍乘間游騎掠巴爾達穆特塔本集賽諸鄂拓克。五月。褫策凌玉保職。以達爾黨阿哈達哈代之。兼

命兆惠自巴里坤往援。七月。車凌車凌烏巴什剛多爾濟等以徙牧額爾齊斯。請定入覲年班。

上嘉其誠惻。

詔自來年始定三班前給從軍駝馬姑緩期納示恤車
凌從眾乘從牧有劫驛騎者參贊大臣舒赫德巡軍汎
至努克木倫聞之往詰罪車凌察劫者以獻請論罪。

諭嘉其恭順。

賜佩飾獎之既而汗哈屯烏梁海眾附和託輝特逆賊
青衮咱卜叛。

詔車凌率兵從剿和碩特台吉諾爾布敦多克及子鄂
齊爾相繼卒。

詔以鄂齊爾弟博爾和津襲公爵。

諭曰諾爾布敦多克舊牧與哈薩克接壤恐或掠之若欲徙歸額琳哈畢爾噶惟其便沙克都爾曼濟攜子圖捫及博爾和津等由珠勒都斯至巴里坤乞屯牧近地副都統雅爾哈善以聞

諭曰沙克都爾曼濟以舊牧乏生計跋涉遠至殊堪憫惻準噶爾頻年不靖諸部生計維艱然使台吉等各收其屬安處游牧以耕畜爲業善自謀生不數年間可復舊業今沙克都爾曼濟等雖暫處巴里坤究非故土難以久處又喀爾喀附近之和碩特杜爾伯特輝特等俱將遣歸舊牧且諭令各安生業嚴戢盜賊沙克都爾曼

濟等自宜仍歸舊牧。但甫從遠道至，遽令之歸，不免困頓。可令暫處巴里坤附近地，賞給糧米如戶口數。復

遣使諭沙克都爾曼濟及綽羅斯汗噶爾藏多爾濟輝特汗巴雅爾曰：爾等自入覲歸牧後，遵朕諭旨約束，所屬守分安居，已逾一載，甚勞遠念。今特遣官存問，并令齎賜食物佩飾，以示優眷。逆賊阿睦爾撒納現竄匿哈薩克，苟延殘喘，朕遣官兵征剿，經年時屆寒冬，暫令撤還。第逆賊狡詐百出，倘遣人赴爾等游牧，詭計煽惑，爾等卽行擒獻。至沙克都爾曼濟奏請游牧巴里坤附近地，已諭酌賜口糧，俟明春復賞給籽種，耕耨度集額卜。

齊布拉克地秋收後遣歸舊牧爾等其善自謀生永享昇平之福七月

諭曰輝特杜爾伯特人等朕降旨令歸舊牧札哈沁亦應一體辦理但札木禪現赴軍所著暫停徙俟大兵凱旋時哈達哈傳諭札木禪令率屬徙歸舊牧安居樂業以副朕軫恤意九月伯什阿噶什來朝弟達瓦濟特及兒子丹巴都噶爾布魯特扣肯以視牧故各遣宰桑代至

賜宴賚馬七百牛百五十羊三千

詔編旗分佐領如三車凌及剛多爾濟等來歸例別爲

一盟以伯什阿噶什爲盟長。烏巴什副之。丹巴都噶爾授協理台吉。伯什阿噶什甫歸牧。其妻卒。遣侍衛佛保往醮。伯什阿噶什尋卒。無子。

詔副都統唐喀祿賻祭宣。

諭以丹巴都噶爾爲札薩克固山貝子。以達瓦濟特爲札薩克公。轄伯什阿噶什衆。聽歸車凌牧。或內徙。而丹巴都噶爾與佐領色布騰互攘畜產。佛保將至牧。駝馬爲所掠。

詔撤恩命還復。

諭烏巴什勿驚懼。俟事定。歸車凌牧。後烏巴什卒。停襲。

沙克都爾曼濟獻所部盜馬者請論罪。

諭曰。厄魯特劫奪成風。不可不嚴加懲創。爾等擒獲竊賊。解送內地。甚屬恭順。嗣後可自治之。復以博爾和津幼不更事。

諭沙克都爾曼濟留心護視。并令其族摩羅及宰桑新登等。暫理牧務。而諸衛拉特復不靖。初西路將軍達爾黨阿。追阿逆于哈薩克境。與阿逆相隔一谷。僅二三里。賊倉卒不及駝載。詭稱爲哈薩克使。告曰。卽欲擒獻。因其汗未至。乞暫緩師。達爾黨阿信之。阿逆遂遁去。檄索往還。頓兵數月。無要領。而北路將軍哈達哈。遇哈薩克

兵于巴顏山不迎擊聽其自去諸從征新降台吉宰桑有輕我心又適遇喀爾喀郡王青衮咱卜之叛自十六驛至二十九驛軍台皆撤於是輝特汗巴雅爾詭稱沙克都爾曼濟掠所部牧將以兵襲巴里坤先叛綽羅斯汗噶爾藏多爾濟之從子台吉札納噶爾布及噶勒雜特宰桑哈薩克錫喇次之噶爾藏多爾濟與布魯古特台吉呢瑪次之都統和起被誘殲焉阿逆聞之亦自哈薩克歸會諸賊於博羅塔拉河欲自立爲汗策凌玉保時已違問亦被害於途定邊右副將軍兆惠以兵千五百駐防伊犁聞變自濟爾哈朗河轉戰而南自十一月

起行戰于鄂壘札拉圖戰于庫圖齊戰于達勒奇前後
殺賊數千阿拉善二等台吉達瓦車稜從大軍勦厄魯
特竄黨遇伏於博囉齊奮擊之陣歿。

詔議卹入祠昭忠祠先是阿寶屬達瑪琳從靖邊大將
軍傅爾丹擊準噶爾於和通呼爾哈諾爾爲所掠至是
攜孥及屬布庫勒等四十戶詣都統雅爾哈善軍請歸
阿拉善舊牧。

詔如所請從眾仍置伊犁。

二十二年正月兆惠軍至烏魯木齊賊兵四合我兵無
不一當百二十二日至特訥格軍士饑寒不復能戰乃

結營自固。會侍衛圖倫楚奉

詔率巴里坤兵二千。間道往迎。圍乃解。兆惠得新兵。復往剿巴雅爾部落。始回巴里坤。三月。

命定邊左副將軍成袞札布爲定邊將軍。偕參贊大臣舒赫德。由珠勒都斯進。右副將軍兆惠爲伊犁將軍。偕參贊大臣富德。由額琳哈畢爾噶進。成袞札布軍過克勒特烏魯特沙拉斯瑪琥斯諸鄂拓克。皆撫降其衆。而未取其駝馬。旣過。皆叛去。乃旋師殲除之。兆惠軍行至庫隴癸。地近伊犁。叛黨昂克圖塔爾巴等據險抗拒。適大軍前行。後隊將士僅八十餘人。乘曉霧與鏖戰。并於

奪險攻賊時遣侍衛札延保收其牧羣賊不能脫四字
桑殲其二餘眾悉被斬獲所向克捷適阿睦爾撒納竊
哈薩克馬竄歸伊犁揚言哈薩克助已聚眾爭長突遇
大兵至脫身遁時噶爾藏多爾濟已爲其從子札納噶
爾布所殺扈魯瑪台吉達瓦又殺札納噶爾布獻其首
於軍門侍衛海蘭察追射巴雅爾獲之時和碩特汗沙
克都爾曼濟心懷兩端遣謀赴巴里坤偵大軍狀子圖
捫死不以告參贊大臣雅爾哈善召之稱病不至疑果
叛宵抵其營殲之斬眾四千餘叛黨悉伏法唯阿逆未
獲先是阿拉善札薩克羅卜藏多爾濟以兵千赴北路

從成袞札布。剿和託輝特逆賊。兵甫備。北路軍藏功。

詔仍選兵五百。赴西路。羅卜藏多爾濟聞。

命自游牧備駝馬餼糧。馳抵巴里坤軍。至是偵阿逆由

博羅塔拉走阿卜克特。偕副都統愛隆阿等。分道馳擊。

抵塔爾巴噶台。謀輝特逆賊巴雅爾。據嶺險。捕之。賊遁。

尾六日。次愛登蘇。哈薩克兵二百餘。遮道。羅卜藏多爾

濟等。僅數騎。塵擊之。哈薩克兵懼。乞降。巴雅爾尋就擒。

詔晉封多羅郡王。授參贊大臣。六月。富德等窮追阿逆。

至左哈薩克。時哈薩克汗阿布賚。已與阿逆積釁。且懼

招大兵。遣使入貢。誓擒阿逆以獻。適阿逆率二十人往。

投。阿布賚先使人收其馬。阿逆驚。攜八人。徒步夜走。俄羅斯界。移檄索之。是冬。報阿逆患痘死。移尸近邊。

命喀爾喀親王侍郎三泰等。馳驗以聞。於是成哀札布。仍以定邊左副將軍。歸鎮烏里雅蘇台。兆惠富德留伊犁度冬。是年。車凌以哈薩克不擒獻阿逆。諸厄魯特叛。擾邊。請由額爾齊斯。徙牧烏蘭固木。避之時。喀爾喀貝子車布登札布遵。

旨遣兵捕掠佛保賊。收伯什阿噶什屬戶。給喀爾喀將。遣博東齊歸車凌牧。族台吉布圖庫班珠爾布林等。挈屬至。稱與車凌等析處久。請異牧。

允之布圖庫等抵汎聞佛保自哈達青吉勒歸和碩特
台吉桑濟復掠諸道遣從卒馳馬迎

上聞之

諭曰車凌等自歸誠以來感激朕恩約束屬眾甚爲靜謐邇因叛賊紛起亟請內徙游牧其歸附之心益堅可允所請并給穀種令爲謀生資博東齊雖與杜爾伯特同族若往歸之反仰賴車凌等養贍著遣往烏里雅蘇台交車布登札布酌徙呼倫貝爾道肯呼裕爾等處布圖庫班珠爾等接迎侍衛佛保俟至烏里雅蘇台軍所各給幣賞之

詔車凌烏巴什或從車凌往或游牧科布多惟其便博
東齊及布圖庫等遂並置呼倫貝爾布圖庫班珠爾以
內附誠各授二等台吉而貝勒巴圖博羅特輔國公舍
稜不從車凌等徙牧叛應阿睦爾撒納副都統瑚爾起
以兵擒諸輝巴朗山妻孥悉論誅噶勒雜特宰桑哈薩
克錫喇附阿逆叛大軍將由西路進剿

詔副都統唐喀祿宣諭車凌曰哈薩克錫喇等或勢窮
力蹙逃赴哈薩克境爾等其簡兵防守游牧并堵禦通
哈薩克隘口遇賊竄卽擒獻此特爲保護所部游牧計
非令其出兵協剿也會哈薩克錫喇遣得木齊巴圖濟

爾鳴爾來誘叛。車凌械赴科布多軍。而自攜其眾。徙牧和通呼爾哈諾爾。唐喀祿適至。車凌既奉

命。遣卒七十護唐喀祿往諭諸部。道遇車凌烏巴什。徙就車凌。唐喀祿語曰。厄魯特哈薩克錫喇叛擾額爾齊斯。我將赴西路軍協剿。車凌烏巴什遣護衛巴顏及卒三十從之。且稱額爾齊斯及烏隆古地。值盛夏。多蚊蛇。道不可行。額琳哈畢爾鳴哈布塔克拜達克皆以察罕郭勒爲要汛。請往禦賊於其地。唐喀祿悉疏以聞。上嘉其誠順。且明大義。並

賜幣及佩飾。游牧俄羅斯額濟勒河之土爾扈特。使吹

札布等自唐古特還。先是其汗敦囉布喇什欲謁遠賴喇嘛。使吹札布假道俄羅斯。三年乃至。于二十一年入覲。

賜宴萬樹園。

遣官護往唐古特。至是還。

旨詢所部牧域。及棄準噶爾附俄羅斯故。使者言聞土爾扈特部。舊偕四衛拉特聚伊犁。迄策妄阿喇布坦時。阿玉奇與交惡。挈族由哈薩克。取明噶特眾。屯牧額濟勒河。倚騰吉思巨澤。所居地曰瑪努把海。北界俄羅斯。南界哈薩克。東界哈喇哈爾榜。西界圖里雅斯科。以鄰

牧互市皮馬。俄羅斯嘗與雪西洋及西費雅斯科戰。土爾扈特以兵助之。厥後稍就弱。俄羅斯因謂爲其屬。然附之。非降之也。非。

大皇帝有命。安冒自爲人臣僕。時哈薩克汗阿布賚內附。子登努勒蘇爾統鄰牧土爾扈特。吹札布聞其表使將至。言曰。哈薩克爲。

天朝臣僕。若。

諭令由所部納貢。無紆道慮。幸甚。因述所居疆域。繪獻詔遣歸。頒賜敦囉布喇什幣物。而是時族台吉巴圖爾烏巴什及舍稜等。以附牧準噶爾。乘阿逆叛。擾伊犁境。

巴圖爾烏巴什爲大軍所逼走死舍稜詭乞降竄俄羅斯尋歸土爾扈特牧先是杜爾伯特及烏梁海未內屬錯牧額爾齊斯後杜爾伯特諸台吉游牧扎克拜達里克初徙牧額克阿喇勒再徙額爾齊斯烏梁海就撫以烏蘭固木地給之車凌等復請由額爾齊斯往徙遣都統納穆札爾往勘杜爾伯特及烏梁海牧界車凌復請以烏蘭固木爲屯耕地而游牧于科布多額克阿喇勒允之

詔嚴禁所屬勿攘竊尋以錯牧不便定烏蘭固木爲杜爾伯特牧別以科布多爲烏梁海牧車凌諜明噶特烏

梁海眾叛竄哈喇哈爾榜復遣兵剿

詔酌賞從軍弁兵免追從征達瓦齊所給駝馬有察衰者其壻也附阿逆叛聞追軍至竄和落霍斯河爲達什所擒獻論誅宥其妻給車凌準噶爾竄黨有額爾克勝者準噶爾二十四鄂拓克之一也旣降尋叛謀竄俄羅斯有不從者二人中道脫歸至車凌所以告車凌以其一械送科布多軍以一給輝特札薩克袞布爲導令率兵六十往剿袞布馳踰阿爾台遇賊於杭愛海圖擒斬其男俘妻女歸無脫者

獎賜茶幣杜爾伯特貝子羅壘永端布圖克森相繼卒

皆無嗣。

詔以其屬給剛多爾濟及貝子額爾德尼轄之以和碩特公巴勒濟同收之輝特台吉車卜登多爾濟等叛誅詔巴勒濟族徙牧察哈爾於是輔國公色布騰札薩克台吉特默齊從往皆唐古特達賴汗裔也輝特族叛輔國公巴桑及同收之台吉阿卜達什克什克特等不從攜馬至科布多汎以情告。

上以其非輝特族且無叛迹命署定邊右副將軍車布登札布徙黑龍江以管旗章京端多卜護之往給糗傳克什克特未就道疾卒巴桑及阿卜達什屬凡五十三

人將軍綽爾多議置之呼倫貝爾。

二十三年春。

命兆惠等率兵四千。兆惠由博羅布爾富德。由賽里木分兩翼圍剿。約相會於伊犁。是時厄魯特眾往往流爲瑪哈沁。出沒無常。故分隊剿之。杜爾伯特札薩克特古斯庫魯克達賴汗車凌卒。

上以車凌識時慕義。率屬歸誠。始終效力。鈐收靜謐。軫悼。賜賻祭。子索羅木袞布襲。授盟長。

詔勤習收務。六月。索羅木袞布以疾故。請往禮哲卜尊丹巴呼圖克圖。

詔聽之九月。

諭曰盟長分理全部所係甚要聞索羅木哀布襲封後時有疾今已授巴桑爲副盟長巴桑亦係少年恐不更事親王車凌烏巴什貝子瑪什巴圖等誼關同族自應視如一體務宜悉心協助加意辦理不可稍存彼我之見初土爾扈特族皆游牧額濟勒河與準噶爾絕其族舍稜者衛哀察布察齊六世孫也與巴圖爾烏巴什爲從父兄弟獨率其戚屬附牧伊犁境爲準噶爾屬台吉達瓦齊就擒舍稜不卽降阿睦爾撒納叛我師分道馳剿舍稜復乘間竄阿睦爾撒納走死其從逆之綽和爾

烏喇特昂吉岱等附巴圖爾烏什竄伏沙拉伯勒敦多克布庫察罕等復附舍稜匿庫烏蘇喀喇塔拉境至是詔定邊將軍成袞札布右副將軍兆惠等馳剿巴圖爾烏巴什竄哈薩克病痘死舍稜竄博囉搭拉道遇哈薩克游騎與交兵聞大軍逼馳走道圖托羅海將爲奔俄羅斯計先使往哈薩克要而殺之舍稜復問道赴阿固爾阿爾海副都統唐喀祿偕厄魯特散秩大臣和碩齊以兵尾之抵布古什河源有巴爾呼卒都圖者射舍稜從弟勞章札布仆擒之舍稜詭服罪請釋其弟乃降唐喀祿曰是不可信將以兵擒舍稜和碩齊曰擒之無益

不若招使降。釋勞章札布歸。越日舍稜遣三宰桑至軍。約往受降。唐喀祿愈疑之。和碩齊曰。彼畏我軍威。故不敢至。盍往蒞盟。強唐喀祿行。策馬渡河。迺舍稜營。令從者皆下馬。解橐鞬。舍稜遣使以酒至。和碩齊飲之。急起入舍稜營。唐喀祿立而待。逾時和碩齊不返。舍稜遣賊眾二千。詭攜駝馬迎我軍。甫次河岸。輒旋擊營中。賊悉起。唐喀祿死之。和碩齊易服入賊隊。後就擒。論罪誅。舍稜馳踰喀喇瑪嶺。遣使俄羅斯。爲所禁。間道赴土爾扈特。俄羅斯羈諸森博羅特圖喇。

詔遣兵擊之。未至。俄羅斯徙入其境。巴圖爾烏巴什子

沙喇扣官亦從往焉。初我使與俄羅斯定議不納逋逃人。至是論理藩院檄俄羅斯以舍稜獻舍稜懼由俄羅斯歸土爾扈特牧。是年阿拉善札薩克郡王羅卜藏多爾濟從定邊右副將軍車布登札布剿叛賊哈薩克錫喇及布庫察罕等。抵和落霍斯賊據岡拒驟擊之。獲布庫察罕黨阿都齊。進兵哈魯勒托羅海。偵布庫察罕由庫克烏蘇走哈薩克。將往索定邊將軍兆惠檄以兵屯阿勒坦額默勒。剿喀喇沁宰桑等於庫隴癸嶺。恩克圖就擒。哈薩克尋以布庫察罕獻。

命羅卜藏多爾濟歸牧暫休。固請留軍已病足。

上憫之。慰令歸牧。

賞三眼孔雀翎。烏梁海種人明噶特叛。定邊左副將軍成袞札布檄杜爾伯特札薩克輔國公巴圖蒙克追剿之。明噶特舊爲厄魯特屬。以大軍定伊犁。乞降。

詔置之黑龍江之呼倫貝爾。旣而由納林喀喇泥叛遁。巴圖蒙克追之。遇諸烏蘭固木河。環以兵。不卽降。中夜圍稍懈。賊乘間逸。成袞札布劾之。

上以杜爾伯特部新附。且聞檄卽以兵往。

詔免飭責。仍量加賞賚。大軍剿嗎哈沁。偵沙拉斯瑪呼斯賊。竄呼爾塔克羅卜諾爾。以地近噶斯通青海。

詔副都統濟福赴西甯宣諭所部集兵千爲備復遣識
噶斯道者偵賊蹤旣而所部兵集札噶蘇台

詔歸牧聽調勿遽就道濟福遵

旨諭之請遣近牧者歸仍量留遠道兵屯烏圖備不虞
上鑒其誠

詔酌賞遣歸兵久之噶斯無賊蹤乃撤烏圖兵還

二十四年大軍剿逆回布拉呢敦霍集占阿拉善郡王
羅卜藏多爾濟獻羊五千助軍

詔給值

賜幣及佩飾大軍旋遵

旨攜所部弁兵與飲至宴。

詔圖形紫光閣。御製贊曰：渭陽所出，札薩穎材。命帥本部，宣力龍堆。及愛隆阿、單騎見虜，降哈薩克。厥功甚鉅。陝甘總督楊應琚奏：青海得卜特爾、伊克柴達木等處，設汛屯兵，爲防準噶爾計。今準噶爾及回部悉底定，請撤青海駐汛兵。

從之。初，阿拉善輔國公衮楚克率兵百，從剿庫車逆回，圍其郭，敗賊，援兵霍集占尋攜賊五千餘來援，鏖擊之。賊黨逃走，追至鄂根河，蘇巴什山陣斬三百餘級。

諭嘉之，賜雙眼孔雀翎。庫車城下，復從大軍降阿克蘇。

及烏什眾進抵葉爾羌分領右翼隊擊賊喀喇烏蘇是年春還阿克蘇

詔晉封鎮國公夏復進兵喀什噶爾霍集占遁巴達克山大軍分道進剿以袁楚克駐防喀什噶爾巴達克山函霍集占首至乃遣歸烏梁海以科布多產貂不給捕請徙就阿爾台陽額爾齊斯

上諭車凌烏巴什等曰額爾齊斯爲爾舊牧今爾移處烏蘭固木烏梁海察達克請游牧額爾齊斯地向曾降旨爾等若願歸舊牧聽爾便今哈薩克已全部內附伊犁厄魯特賊眾復殲無孑遺若爾果願歸舊牧可卽徙

往額爾齊斯所遺烏蘭固木自可給烏梁海處之。但哈薩克新附。非爾等入爲內屬者。比務宜嚴飭所屬。安靜無事。若爾部衆既遵鈐束。而哈薩克反來肆擾。可卽擒誅之。爾等或安土重遷。則額爾齊斯地。與其爲哈薩克俄羅斯所竊據。不若令烏梁海往徙之也。車凌烏巴什等奏。察達克所請地。係烏梁海舊牧。距臣等牧遠。且烏蘭固木地。饒水草。臣等游牧久。請勿徙。以額爾齊斯地。給烏梁海。

詔如所請。十月。以大軍定回部。厥功。

諭車凌烏巴什等知之。十二月。哈薩克襲烏梁海。杜爾

伯特以兵三百餘擊走得

旨獎賚居京師之厄魯特親王多羅額駙達瓦齊卒

諭曰厄魯特親王達瓦齊曾爲準噶爾台吉被獲獻俘朕念伊係外藩宥罪錫爵伊自受恩以來隨侍禁近一意抒忱奮勉且爲人尙屬樸誠今聞溘逝深爲軫惻著給治喪銀千兩伊子羅卜札仍准其襲封郡王理藩院奏土爾扈特公羅卜藏達爾札漸習牧務屬衆咸守法請撤還代理官

允之

二十五年

詔定杜爾伯特管旗章京策塔爾罪。遣戍福建廣東。先是索羅木袞布少而懦。其哈屯布尼達喇喀爾喀女也。鈐所部眾嚴策塔爾忌之。計鱖歸喀爾喀。副管旗章京巴顏克什克訴之。成袞札布所遣員往訊。僉直哈屯成袞札布將重議策塔爾。嫌庇族女。疏請罷策塔爾職。別以和通代之。偕巴顏克什克助汗哈屯理牧務。

諭曰。爲人臣僕。而威脅其汗。且謀逐哈屯。不法已極。宜重罪之。或以新附尙未悉禮法。姑從寬免。然亦不可仍留舊地。致起釁端。其詳勘欺主滋事。不受哈屯約。因計陷之者。解送京師。成袞札布遵。

旨察獲策塔爾黨十四人械至。

詔於福建廣東安置。牧產給索羅木袞布。勿歸公。既而布尼達喇請以巴顏克什克代管旗章京職。

諭曰。策塔爾以巴顏克什克控訴。因而獲罪。若令代之。則無知者妄生希倖。反以互訐爲能。且管旗章京既有和通理之。巴顏克什克令其協助足矣。副都統伊柱視伊犁屯田。至海努克。獲虎鈕銅章一文。曰管轄厄魯特。後旗札薩克印。驛封至。蓋雍正四年頒給茂海物也。茂海叛。挈往準噶爾。獻噶爾丹策凌。至是得之。

詔貯內廷。四月。杜爾伯特部溫圖呼爾者。貧不給。聞其

弟居察哈爾牧。告諸札薩克。往就之。

諭曰。杜爾伯特自歸誠以來。編設旗分佐領。原欲伊等各安生業。若不善恤之。漸至析處。殊爲可憫。其各加意撫綏。令守分謀生。弗至流離失所。副朕惻癯一體之懷。七月。或告車凌烏巴什將叛。欲陰陷之。成袞札布以聞。上鑒其誣。

詔勿問。尋入覲。扈

蹕行圍。奏所部蒙

恩安置。牧產漸饒。嗣請自備駝馬。

上嘉其誠悃。不忍驟勞之。

三十一
詔仍官給駝馬。

二十六年。理藩院議厄魯特公禡木特歸誠後。札哈沁屬相繼內附。置佐領九。得二千餘口。雖補授總管。未給印。請以總管札哈沁一旗印給札木禪轄其眾。

詔允之。杜爾伯特貝勒巴桑從喀爾喀郡王車木楚克札布等剿嗎哈沁宰桑色布騰。偵走俄羅斯。以兵屯鏗格爾圖喇。遣使索俄羅斯擒色布騰及逆黨百餘以獻。賜巴桑幣。徧賞從兵。是年。厄魯特貝子朋素克貝子貢楚克拜自推河徙牧鄂爾坤之烏蘭烏蘇。隸喀爾喀賽音諾顏部。以齊齊爾里克盟長轄之。先是貢楚克拜父

三都布與朋素克自西喇穆稜徙牧喀爾喀河。又徙推河。至是始定。

二十七年。青海諸札薩克請給羅卜藏丹津舊牧地。

詔楊應琚往勘奏。洮賚河等處係西寧肅州鎮標馬廠及番族牧地。不便撥給。西喇郭勒及西爾噶拉金東西五百餘里。南北三十餘里。地曠且距札薩克等游牧近。請給之。其西爾噶拉金踰河。卽產礦山場。久封禁。請飭札薩克等就近守視。

詔以西喇郭勒給之。西爾噶拉金河東聽駐牧。河西鉛礦勿得越界私採。

詔杜爾伯特部左右翼各設副將軍一。右翼用正黃旗。蘇左翼用正白旗。蘇以

敕印軍符給之。所部旗十有六。爵如之。授車凌烏巴什右翼副將軍。

命御前行走。

賜岱青卓里克圖號。授巴桑左翼副將軍。厄魯特多羅郡王羅卜札尙郡君。授固山額駙。

二十八年。烏梁海叛。賊庫克辛走俄羅斯。道掠哈薩克馬車凌烏巴什。率兵緝之。偵匿和羅圖郭爾。馳往擊賊。潰竄。尾至林際。獲之。斬庫克辛及從黨五十八人。俘其

孛及戶七十餘歸。

詔賜幣并酌賞弁兵。有台吉巴朗者其甥也。幼被哈薩克掠。至是脫歸伊犁。請隸車凌烏巴什。

詔給之。

三十年。

詔晉封阿拉善額駙羅卜藏多爾濟和碩親王。賞元狐裘及黃轡。厄魯特一等台吉噶爾丹達爾札卒。子拉克沁噶喇襲。

詔授札薩克給印。編佐領一。隸喀爾喀札薩克圖汗部。以札克畢賴色欽畢都哩雅諾爾盟長轄之。